

大學章解

附系統圖

30.927

本書二版續印八百一十冊印費承

杜聿明先生捐洋貳萬元

蔣瑞清先生捐洋貳萬元

王志一先生捐洋壹萬元

溫天偉先生捐洋貳千元

王煥然先生捐洋貳千元

童曙明先生捐洋伍百元

諸先生志切援溺情殷救世特此申謝藉表高誼

附 言

是書暨附圖內容。以吾國堯舜禹湯文武周公危微精一之傳爲標準。以忠恕仁義一貫之旨爲體用。以諸子百家千門萬教之言爲綜合。以近代唯心唯物精神物質文明爲經緯。誠政教合一之軌範。世界大同之樞則。自由平等互助之正鵠。學者人手一編。其於修己治人。誠始誠終。一本萬殊。萬殊歸一之義。思過半矣。

大學章解

陝西延長劉遜齋述

大學總論

大學者。大人之學也。天德王道。體用皆備。精神物質。合而爲一之學也。全書大旨。悉備於開首在明明德。在親民。在止於至善三語。接連三在字。有缺一不可之義。在明明德。卽全書之總樞紐也。所謂明體是也。在親民。卽全書之總條目也。所謂達用是也。在止於至善。卽全書之總目的也。所謂無所不用其極是也。三者畢具。則爲大中至正。不偏不倚。堯舜禹湯文武周公孔孟相傳內聖外王之道也。三者缺一。則成楊朱墨翟。唯心唯物。各不附麗之說也。其初也。差以毫厘。其末也。謬以千里矣。竊嘗反復論之。欲正人者。必先正己。欲達用者。必先明體。此一定不移之理也。明明德之目。在於格致誠正。親民之目。在於修齊治平。二者雖有內外之分。然均須止於至善則一也。蓋內不止於至善。則無以厥性復初。復見天地之心也。外不止於至善。則成徒託空言。無裨實際也。然明明德親民。皆以一誠貫澈始終也。而誠意之發。首在求放心。誠意之致。次在知所止。誠意之至。終在慎其獨。慎獨之極。則人我雙忘。渾然天理。卽顏子心齋坐忘。中庸喜怒哀樂未發之中。虞廷十六字薪傳之允執厥中時也。一時能允執厥中。則是一時之聖賢。時時能允執厥中。則是時時之聖賢。終其身能允執厥中。則與天地合德。日月合明。四時合序。鬼神合其吉凶。明明德之分量。方爲

盡之矣。或曰。如子所言。則大學格致誠正之功。不幾全等空言乎。予應之曰。孟子曰。學問之道無他。求其放心而已。中庸曰。至誠之道。可以前知。又曰。至誠不息。又曰誠者。物之終始。不誠無物。是故君子。誠之爲貴。又曰。自誠明。謂之性。又曰。誠則明矣。又曰。誠者。天之道也。誠之者。人之道也。誠者。不勉而中。不思而得。從容中道。聖人也。誠之者。擇善而固執之也。又曰。誠身有道。不明乎善。不誠乎身矣。又曰唯天下至誠。爲能盡其性。能盡其性。則能盡人之性。能盡人之性。則能盡物之性。能盡物之性。則可以贊大地之化育。可以贊天地之化育。則可以與天地參矣。又曰。其次致曲。曲能有誠。誠則形。形則著。著則明。明則動。動則變。變則化。唯天下至誠。爲能化。又曰。至誠如神。又曰。誠者。自成也。又曰。誠者。非自成已而已矣。所以成物也。又曰。天地之道。可一言而盡也。其爲物不二。則其生物不測。又曰。唯天下至誠。爲能經綸天下之大經。立天下之大本。知天地之化育。夫焉有所倚。又曰。夫微之顯。誠之不可揜如此夫。以此言之。誠意者。實天道人道。大學中庸兩書貫串之總線索也。曰。從容中道。曰。擇善固執。曰致曲。曰爲物不二。曰夫焉有所倚。皆盡誠意之法門也。而從容中道。擇善固執。爲物不二。夫焉有所倚。其次致曲。非知止慎獨而何。曰自誠明。曰能盡其性。曰至誠如神。曰至誠之道。可以前知。曰惟天下至誠。爲能經綸天下之大經。立天下之大本。知天地之化育。所謂致中和矣。吾之全體大用無不明矣。而曰物不格。知不止。心不正。意不誠。有是理乎。予

故曰。格致誠正者。明明德之總條目也。誠意者。格致誠正之總線索也。知止慎獨者。誠意之總持法門也。亦格致誠正之總細則次第也。或又曰。物格知至。意誠心正。吾心之全體大用。既已明矣。而天下國家。萬事萬物之理。尙未盡知。將如之何而致乎。予應之曰。吾心之全體大用。既已明矣。而天下國家。萬事萬物。是非邪正。善惡好惡。一應於前。自能明矣。周子曰。幾善惡。易曰。顏子有不善。未嘗不知。知之未嘗復行是也。然恐知有未盡。故必須即物而窮其理之當然。方能動靜咸宜。中節中竅也。譬之行路然。目的地之所在。雖早具于胸中。而中間跋涉險夷。自難盡悉。若不虛心諮詢。將有顛蹶途窮之虞也。詩云穆穆文王。於緝熙敬止。爲人君止于仁。爲人臣止于敬。爲人子止于孝。爲人父止于慈。與國人交止于信。雖皆吾明明德于天下固有之事。吾誠意表顯於外現象之當然者。然究應如何盡仁盡敬盡孝盡慈盡信。自不得不周諮博采。集思廣益。條分縷晰。文理密察。方能達其目的所在。而止于至善也。予故曰。修齊治平者。親民之總條目也。誠意者。修齊治平之總線索也。仁敬孝慈信者。誠意之總法門也。亦修齊治平之總細則次第也。大學之道。在明明德。在親民。在止于至善。孔孟傳授心法之微言大意。始昭然若揭。如日月經天。江河行地。千百萬世。不可得而易矣。

第一章

大學之道。在明明德。在親民。在止於至善。知止而后有定。定而后能靜。靜而后能安。安而后能慮。慮而后能得。物有本末。事有終始。知所先後。則近道矣。古之欲明明德於天下者。先治其國。欲治其國者。先齊其家。欲齊其家者。先修其身。欲修其身者。先正其心。欲正其心者。先誠其意。欲誠其意者。先致其知。致知在格物。物格而后知至。知至而后意誠。意誠而后心正。心正而后身修。身修而后家齊。家齊而后國治。國治而后天下平。自天子以至於庶人。壹是皆以修身爲本。其本亂而末治者否矣。其所厚者薄。而其所薄者厚。未之有也。此謂知本。此謂知之至也。

章解 此章大學之道云云。說明仁心仁政之大綱。以精神文明爲體。以物質文明爲用。以在止於至善爲歸。質言之。即宗旨方法目的。各臻其極也。知止云云。說明一本爲明明德之標準。即孔子告顏子以克己復禮爲仁。中庸莫顯莫懿。必慎其獨。以及誠者擇善固執。周蓮溪

之存誠主靜。張南軒之王一勿適之義。所謂萬殊在於一本是也。物有本末云云。說明萬物由本以至末。萬事知終以起始也。古之欲明明德於天下云云。說明治人之步驟。結於修己。即天下之不在國。國之本在家。家之本在身。所謂有堯舜之政。須有堯舜之人也。物格而后知至云云。說明有堯舜之政。須有堯舜之人。仍須有堯舜之民。方能不令而行。速於置郵傳命也。自天子以至於庶人云云。說明不論行使政權治權之人。一切皆以正心修身爲本也。其本亂而末治者云云。說明源清者流自遠。若愛親差等。本末顛倒。未有能濟者也。謹按孔孟之道。以仁義爲本。大學者。推行仁政之標準方案也。首章大意。已將大經大法備載無遺。茲就本章體用言之。三綱領者。明體也。知止以下各節云云者。達用也。就三綱領體用言之。明明德爲體。在親民爲用。止於至善爲體用合一之歸。就知止一節言之。知止爲體。定靜安慮得爲用。再就古之欲明明德於天下言之。先治其國爲體。致知在格物爲用。中庸所謂自明而誠者也。更就物格而后知至言之。格致誠止爲體。修齊治平爲用。中庸所謂自誠而明者也。以修己治人言之。則須明誠。以下學上達言之。則須誠明。所謂體中有用。用中有體是也。至體用一貫之理。可以物理證明者。厥爲動植等物。今試以桃杏言之。其仁即孔孟之仁也。所謂仁人心也。亦仁人之安宅也。亦一本是也。其枝幹花葉。即孔孟之義也。所謂義仁路也。亦萬殊是也。其果熟蒂落。所謂止於至善者也。亦義精仁熟是也。如此生生不已。卽由一本散而萬殊。復由萬殊歸於一本。所謂天地之大德曰生之義也。亦仁者愛

人之義也。植物如斯。動物亦如斯。世間一切萬物。亦無不如斯。知仁義之不可分離。則知大學明親真諦之精義所在。知義精仁熟之真義所在。則知止於至善。爲會極歸極之旨歸也。明乎此。則知孔子禮運大同。孟子己溺己饑。張橫渠民胞物與。陳白沙萬物一體。立言設教之苦衷。昭然若揭矣。

第二章

康誥曰。克明德。太甲曰。顧諟天之明命。帝典曰。克明峻德。皆自明也。湯之盤銘曰。苟日新。日日新。又日新。康誥曰。作新民。詩云。周雖舊邦。其命維新。是故君子。無所不用其極。詩云。邦畿千里。惟民所止。詩云。緡蠻黃鳥。止於丘隅。子曰。於止。知其所止。可以人而不如鳥乎。詩云。穆穆文王。於緡熙敬止。爲人君。止於仁。爲仁臣。止於敬。爲人子。止於孝。爲人父。止於慈。與國人交。止於信。詩云。瞻彼淇澳。綠竹猗猗。有斐君子。如切如磋。如琢如磨。瑟兮僩兮。赫兮喧兮。有斐君

子。終不可諠兮。如切如磋者。道學也。如琢如磨者。自修也。瑟兮僩兮者。恂慄也。赫兮喧兮者。威儀也。有斐君子。終不可諠兮者。道盛德至善。民之不能忘也。詩云。於戲前王不忘。君子賢其賢而親其親。小人樂其樂而利其利。此以沒世不忘也。子曰。聽訟吾猶人也。必也使無訟乎。無情者。不得盡其辭。大畏民志。此謂知本。

章解 此章大旨。以仁心仁政之施行。重在正己化人。康誥曰。克明德云云。說明二帝三王之善政。皆先以止己爲本。曰克明峻德者。即論語克己復禮爲仁之義。亦爲仁由己之義也。曰顧諟天之明命者。書稱念茲在茲。允執厥中之義也。湯之盤銘曰云云。說明天行健。君子以自強不息。即誠中形外。過化從神之義也。亦中庸君子之德風。小人之德草。草上之風必偃之義也。至凡有血氣者。莫不尊親而後已。詩云。邦畿千里云云。說明自新新民（正己化人）皆當知其極致之旨歸也。詩云。穆穆文王云云。說明慎獨居敬。爲成己之正鵠。仁敬孝慈信。爲成人成物之正鵠。詩云。瞻彼淇澳云云。說明君子之道。闇然而日彰之義。至其進德修業。皆從溫故知新。戰兢惕懼中得來。平時敬而無失於人。恭而有禮。正其衣冠。

。尊其瞻視。故能不賞而民勸。不怒而民威於鈇鉞也。詩云於戲前王不忘云云。說明上老老而民興孝。上長長而民興弟。尊賢使能。則天下之士皆悅而願立於朝之義。亦論語上好禮則民莫敢不服。上好信則民莫敢不用情之義也。子曰聽訟吾猶人也云云。說明親民之大端。以不爭爲要。而不爭之道。先須人倫明於上也。家語稱孔子爲魯司寇。赦父子訟。即此義也。竊嘗論之。仁政之推行。不外親親尊賢愛物三大端。而親親尊賢愛物之實現。則以居敬慎獨。正心修身爲本。論語曰。政者正也。所以正人之不正也。又曰。子率以正。孰敢不正。又曰。其身正。不令而行。其身不正。雖令不從。孟子曰。老吾老以及人之老。幼吾幼以及人之幼。天下可運於掌上。今試以往事證之。大禹泣囚。天下歸心。文王養老。周道以隆。舜耕歷山。歷山之人皆讓畔。管甯居遼。從之者如歸市。其初也皆原一己之心正身修。其終也。達之天下。河清海宴矣。孟子曰。聞伯夷之風者。頑夫廉。懦夫有立志。聞柳下惠之風者。匹夫寬。薄天敦。有天下國家之責者。有人民一份之責者。曷三復斯言。不禁馨香祝之。

第三章

所謂誠其意者。毋自欺也。如惡惡臭。如好好色。此之謂自謙。故君子必慎其獨也。小人閒居爲不善。無所不至。見君子而

後厭然。揜其不善。而著其善。人之視己。如見其肺肝然。則何益矣。此謂誠於中。形於外。故君子必慎其獨也。曾子曰。十目所視。十手所指。其嚴乎。富潤屋。德潤身。心廣體胖。故君子必誠其意。

章解 此章所謂誠其意者云云。說明誠意之眞實現象。在於不自滿。而思誠之道。則在於慎獨也。小人閒居爲不善云云。說明虛僞不誠。自欺欺人。欲蓋彌彰之醜態。爲慎獨之君子所鄙棄也。曾子曰。十目所視云云。說明暗室屋漏不可欺之眞實無妄之義也。富潤屋云云。說明躬行君子。盡誠之見面盎背。施於四體。四體不言而喻之義也。謹按聖學大旨。不外誠之一字。格致誠正者。思誠之道也。修齊治平者。盡誠之事也。慎獨者。思誠之不二法門也。亦盡誠之出發止歸也。試以論孟言之。孔子立言。多就仁說。孟子七篇。仁義並提。言仁者。明一本也。仁義並提者。明一本萬殊也。論語解仁字之最明切者。莫若答顏子問仁曰。克己復禮爲仁一語之爲的當也。其解義字之最精確者。莫若首章孝弟也者。其爲仁之本與之爲明顯也。蓋克己復禮爲仁者。即大學格致誠正之義也。仁即孟子仁人心也。仁人之安宅也。不慮而知者。其良知也。易寂然不動。中庸喜怒哀樂未發之義也。孝弟也者。其爲人之本與者。即大學在親民之義也。亦中庸發而皆中節之義也。亦易感而遂通之義也。亦孟子

堯舜之道。率弟而已矣。義者仁之正路也。不學而能者。其良能也之義也。居仁由義者。即大學明親一貫。中庸致中和。論語忠恕一貫之義也。知仁體之爲一。則知中庸誠者不勉而中。不思而得。從容中道。爲物不二之義矣。知爲物不二之義。則知中庸擇善固執爲思誠者之道之義矣。知擇善固執爲思誠者之道。則知慎獨爲大學明明德。中庸喜怒哀樂未發。論語克己復禮爲仁之二法門也。就降衷言之。曰仁。曰忠。曰明德。曰良知。曰未發。曰寂然不動。皆中庸誠者天之道也。就厥性復初言之。曰克己復禮爲仁。曰明明德。曰克明德。曰克明峻德。皆中庸思誠者人之道也。就理一分殊言之。曰易者易也。易簡而天下之理得。曰吾道一以貫之。曰惟精惟一。允執厥中。皆中庸不勉而中。擇善固執之義也。大學此章之前。不言格致。而曰誠意者。明示學人以聖學微言大義之所在。與夫仁心仁政之旨歸也。其首章曰知止。此章又兩曰慎獨。反復叮咛者。特恐後之學者。舍却思誠者之道。殷殷致意也。試再以事物習見之理證之。馬之馴也以羮。舟之行也以舵。指南針之定方向也以樞紐。今欲格物致知。誠意止心。而不以慎獨。是猶無羮之馬。無舵之舟。無樞紐之指南針。而欲其不逾矩迷向也。能之乎否。

第四章

所謂修身在正其心者。身有所忿懣。則不得其正。有所恐懼。則

不得其正。有所好樂。則不得其正。有所憂患。則不得其正。

心不在焉。視而不見。聽而不聞。食而不知其味。此謂修身。在正其心。

章解 此章所謂修身在正其心者云云。說明修身之道。以正心爲先。正心之義。即論語克己復禮爲仁也。亦中庸誠者不勉而中。從容中道。擇善固執之義也。修身之道。即孔子答顏子問仁之目曰。非禮勿視。非禮勿聽。非禮勿言。非禮勿動之義也。修身在正其心者。即中庸尊德性道問學之義也。吾之心既正。身既修矣。譬如明鏡當前。是非善惡之來。宜從宜違。發皆中節。決不至爲物所牽引。而爲非禮之視聽言動也。心不在焉云云。說明操存舍亡之義也。心存則視聽聞味畢知。亡則畢失也。此所以修身必先存心。存心必須至中至正也。謹按大學首章曰。自天子以至於庶人。一是皆以修身爲本。此章言修身必先正心者。蓋以仁政。基於仁心。仁心之發。先須心正。仁政之施。先須身修。此孔門忠恕一貫。仁義兼施之旨。所由來也。中庸云。君子篤恭而天下平。書云。一人元良。萬邦以貞。此達而在上者。正心修身之明效也。論語曰。君子敬而無失於人。恭而有禮。四海之內。皆兄弟也。此達而在下者。正心修身之明驗也。修身之要。須時嚴非禮之戒。正心之道。須時時慎獨。敬而無失也。大學之次章曰。詩云穆穆文王。於緝熙敬止。爲人君止於仁。爲人臣止於敬。爲人父止

於慈。爲人子止於孝。與國人交止於信。此正心修身之標準正鵠也。

第五章

所謂齊其家在修其身者。人之於其所親愛而辟焉。之其所賤惡而辟焉。之其所畏敬而辟焉。之其所哀矜而辟焉。之其所敖惰而辟焉。故好而知其惡。惡而知其美者。天下鮮矣。故諺有之曰。人莫知其子之惡。莫知其苗之碩。此謂身不修。不可以齊其家。

章解 此章所謂齊其家在修其身者云云。說明家之不齊。皆原身之不修。身既不修。則表曲行邪。好惡偏私。倫常乖舛。骨肉參商。尙何家齊之足云哉。故諺有之曰云云。說明今世之人。皆責人則明。恕己則昏。以致身不修而家難齊也。倘能以責人之心責己。恕己之心恕人。好惡一秉於公。又何家齊之難哉。謹按孟子曰。天下之本在國。國之本在家。家之本在身。又曰。身不行道。不行於妻子。論語曰。其身正不令而行。其身不正。雖令不從。又曰。不正其身。如正人何。又曰。修己以敬。中庸曰。修身以道。皆言齊家以修身爲先也。修身之道。則須時嚴非禮之戒。齊家之道。則須推誠心。公好惡。總大綱。寬小過。不以一己之

私意。失和家人。不以閨房之讒言。離間大倫爲要也。孟子曰。父子主恩。又曰。父子之間不責善。責善則離。離則不祥莫大焉。論語曰。入則孝。又曰。事父母能竭其力。此皆修身齊家之寶鑑也。至見諸史冊者。則有竇禹鈞之義方訓子。丹桂齊芳。陳競之上下嫺睦。化及羣犬。張閏之八世同居。兒不識母。不特鄉里流芳。且矜式千古矣。他若專以忍字百餘。不聽婦言爲訓者。則又民斯爲下矣。

第六章

所謂治國。必先齊其家者。其家不可教。而能教人者無之。故君子不出家。而成教於國。孝者。所以事君也。弟者。所以事長也。慈者。所以事衆也。康誥曰。如保赤子。心誠求之。雖不中。不遠矣。未有學養子。而後嫁者也。一家仁。一國興仁。一家讓。一國興讓。一人貪戾。一國作亂。其機如此。此謂一言僨事。一人定國。堯舜率天下以仁。而民從之。桀紂率天下以暴。而民從之。其所令反其所好。而民不從。是故君子有諸已而後求諸

人。無諸己而後非諸人。所藏乎身不恕。而能喻諸人者。未之有也。故治國在齊其家。詩云。桃之夭夭。其葉蓁蓁。之子于歸。宜其家人。宜其家人。而后可以教國人。詩云。宜兄宜弟。宜兄宜弟。而後可以教國人。詩云。其儀不忒。正是四國。其爲父子兄弟足法。而後民法之也。此謂治國在齊其家。

章解 此章所謂治國必先齊其家者云云。說明國由家之集合而成者也。孝弟慈者。齊家治國之本也。孟子曰。孩提之童。無不知愛其親也。及其長也。無不知敬其兄也。親親仁也。敬長義也。即孝弟慈。爲齊家治國之本之所由來也。論語曰。弟子入則孝。出則弟。謹而信。汎愛衆。而親仁。即孝弟慈。爲齊家治國之教所由發也。孟子又曰。堯舜之道。孝弟而已矣。又曰。老吾老。以及人之老。幼吾幼。以及人之幼。天下可運於掌。上。即孝弟慈之政所由施也。孝弟慈雖分爲三。所以行之者一也。一者何。誠是也。一家仁云云。申明國之本在家也。家之本在身之義也。堯舜率天下以仁云云。說明堯舜在上。以仁義導民。則民亦以仁義應之。即孟子子服堯之服。言堯之言。行堯之行。是堯而已矣者也。桀紂在上。以殘暴率民。則民亦以殘暴應之。即孟子子服桀之服。言桀之言。行桀之行。是桀而已矣者也。孟子所謂堯